

Месяца ноемвриа в 19-й день
Святителя Филарета, митрополита Московскаго
На малей вечерни

На Господи, воззвах: стихиры на 4, глас 1.

Подобен: Небесных чинов:

От юности пристанища немятежнаго взыскал еси,/ в
многмятежном мире пребывая, святе Филарете,/ и суеты земныя
молитвою избегл еси./ Во святителях монашески пожив,/ в
монасах архиерей изряден был еси,/ моли о всех, любовию
блажащих тя.

Тайну являшагося Бога проповедуя/ и священныя книги
изъясня,/ святе Филарете,/ словом Божиим насыщал еси люди
алчущия,/ да познают Истину/ и уразумеют, яко благ Господь.
Годину гнева будущаго о отечестве нашем,/ дарова тебе Господь
предзрети, святителю Филарете,/ сего ради, скорбный плач
подъем,/ веру крепку в милосердие Господне о России хранил
еси,/ и ныне у престола Божия/ усердно молишися о спасении ея.
Духом провидел еси, святителю Филарете,/ будущая Земли
Российкия,/ мраком объята и браней исполненная,/ и за
преумножение беззакония любве умаленная,/ темже молил еси
усердно/ вере Православней непоколебимей пребывати.

Слава, глас 6:

Филарета Милостиваго подражателя,/ всея Руси молитвенника,/
святых подвижников собеседника,/ сирот серафимовых
заступника,/ старцев оптинских покровителя,/ скитов и обителей
устроителя,/ учителей учителя, царей наставника,/ ангелов
сликовника во Царствии Небеснем,/ архиерея Божия Филарета
досточуднаго,/ приидите, братие, восхвалим священнолепно.

И ныне, Богородичен: Богородице, Ты еси Лоза истинная:

На стиховне стихиры, глас 7:

Преподобным подвиги твоими уподобился еси,/ чудотворцем
древним – благодатию,/ учителем вселенским – богомудрием,/
первосвятителем Московским – правлением правым,/ Филарете
приснославный.

Стих: Священницы Твои облекутся в правду/ и преподобнии Твои
возрадуются.

Простецем отец милосердный был еси,/ пастырем – архипастырь
истинный,/ иноком – авва богомудрый,/ святителем – образ веры
и благочестия,/ Филарете благоискусный.

Стих: Блажен муж, бояйся Господа,/ в заповедех Его восхощет
зело.

При триех земных царех святительствуя,/ единому же Царю
Небесному служил еси,/ славу человеческую ни во что же
вменяя,/ иго Христово преславно понесл еси,/ Филарете
неботечный.

Слава, глас 8:

Украшение Церкви Христовы/ и Российских святых похвалу,/
прославляем тя днесь, святителю Филарете,/ и молим усердно:/

яко предстоиши у Престола Небеснаго Царя,/ и дерзновенное
ходатайство имаши,/ моли спаситися душам нашим.

И ныне, Богородичен, глас тойже.

Подобен: О, преславнаго чудесе:

О, преславнаго чудесе!/ Небесе и земли Царица,/ от святых
сродников наших умоляемая,/ до ныне землю Русскую
покрывает/ и лика Своего изображении милостивно обогащает./
О, Владычице Державная!/ Не престани и на будущее время/ во
утверждение на Руси Православия/ милости и чудеса изливати до
века. Аминь.

Тропарь, глас 4: Духа Святаго благодать стяжав: писан на велицей
вечерни.

На велицей вечерни

На Господи, воззвах: стихиры, глас 6:

Днесь благодать Святаго Духа нас собра,/ с ликом ангельским и
собором Московских святителей/ праздновати память Филарета
достохвальнаго,/ той бо молит дерзновенно о Церкви Российстей,/
во еже в мире и благостоянии ей быти/ и спаситися душам нашим.

Ины стихиры, глас 2:

Архиерею блаженне Петре,/ подвиги и мощами твоими
первопрестольный град Москву освятивый,/ прииди с нами
ныне,/ да воспоим Филарета святителя,/ иже наследова ти
преславно/ и явися Церкви нашея похвала и утверждение.
Лики празднующих возглави ныне, святителю Алексие,/ да
воспоим Филарета достославнаго,/ иже от гроба твоего клобук
приемый,/ труды многими тебе уподобися/ и явися Церкви нашея
похвала и утверждение.

От Господа избранный/ и собором утвержденный/ пасти народ
Московский,/ Иона благославный/ днесь славословит с нами/
премудра Филарета,/ опасша Церковь Русскую/ и ей во всем
славна явльшася,/ яко похвала и утверждение.

Премудрость книжную возлюбивый/ и собор святых русских
прославивый,/ святителю чудный Макарие,/ восхвали ныне труды
и подвиги Филарета богомудраго,/ яко Церкви нашея похвалу и
утверждение.

Пастырю добрый Филиппе,/ со дерзновением пред царем правду
глаголавый,/ возрадуйся днесь с нами/ торжеству Филарета
богоревниваго,/ егоже укреплял еси молитвами твоими,/ да
явится Церкви нашей похвала и утверждение.

Первый от патриархов Российских,/ Иове многомолитвенный,/
призри днесь на празднество наше,/ еже творим в память
Филарета,/ яко иерарха пречуднаго/ и Церкви нашея похвалу и
утверждение.

Патриарший подвиг страданьми увенчавша,/ Ермогена славнаго
призовем молитвенно,/ да купно с ним инаго печальника земли
нашея,/ Филарета любосмиренна достойно почтим,/ яко Церкви
Российския похвалу и утверждение.

Слава, глас 8:

О, пречудный святителю Филарете,/ аввы Сергия учениче
верный,/ Лавры Троицкия усердный попечителю,/ святителя
Иннокентия, апостолом равночестна, покровителю,/
преподобнаго Антония сотаинниче,/ Серафима досточуднаго
почитателю/ и всех, прибегающих к тебе, крепкий заступниче,/
моли спастися душам нашим.

И ныне, Богородичен: Царь Небесный:

Вход. Прокимен дне. И чтения.

К Тимофею послания святаго апостола Павла чтение

(главы 3 и 4):

Чадо Тимофее!/ Всяко писание богодухновенно и полезно есть ко
учению,/ ко обличению, ко исправлению, к наказанию, еже в
правде,/ да совершен будет Божий человек,/ на всякое дело благое
уготован./ Засвидетельствую убо аз пред Богом и Господем нашим
Иисус Христом,/ хотящим судити живым и мертвым в явлении
Его и Царствии Его./ Проповедуй слово,/ настой благовременне и
безвременне,/ обличи, запрети, умоли со всяким долготерпением
и учением./ Будет бо время,/ егда здраваго учения не послушают,/
но по своих похотех изберут себе учителя, чешими слухом;/ и от
истины слух отвратят и к баснем уклонятся./ Ты же трезвися о
всем,/ злопостражди, дело сотвори благовестника,/ служение твое
известно сотвори./ Аз бо уже жрен бываю/ и время моего
отшествия наста./ Подвигом добрым подвизахся,/ течение
скончах, веру соблюдох,/ прочее убо соблюдается мне венец
правды,/ егоже воздаст ми Господь в день он, Праведный Судия,/
не токмо же мне,/ но и всем возлюбльшим явление Его.

Ко Ефесеем послания святаго апостола Павла чтение

(глава 6):

Братие!/ Возмогайте во Господе и в державе крепости Его:/
облецытеся во вся оружия Божия,/ яко возмощи вам стати
противу кознем диавольским,/ яко несть наша брань к крови и
плоти,/ но к началом и ко властем и к миродержителем тьмы века
сего,/ к духовом злобы поднебесным./ Сего ради примите вся
оружия Божия,/ да возможете противитися в день лют и вся
содеявше стати./ Станите убо препоясани чресла ваша истиною,/
и оболкшесе в броня правды,/ и обувше нозе во уготование
благовествования мира;/ над всеми же восприимше щит веры,/ в
немже возможете вся стрелы лукаваго разжженныя угасити,/ и
шлем спасения восприимите,/ и меч духовный, иже есть глагол
Божий.

Ко Ефесеем послания святаго апостола Павла чтение (глава 6):

Чада!/ Послушайте своих родителей о Господе,/ сие бо есть
праведно./ Чти отца твоего и мать,/ яже есть заповедь первая во
обетовании,/ да благо ти будет и будещи долголетен на земли./ И
отцы, не раздражайте чад своих,/ но воспитывайте их в наказании
и учении Господни./ Раби, послушайте господий своих по плоти
со страхом и трепетом,/ в простоте сердца вашего, якоже и
Христа,/ не пред очима точию работающе, яко

человекоугодницы,/ но якоже раби Христовы,/ творяще волю Божию от души,/ со благоразумием служаще, якоже Господу, а не яко человеком,/ ведяще, яко кийждо, еже аще сотворит благое,/ сие приимет от Господа, аще раб, аще свободь./ И господие, таяжде творите к ним,/ послабляюще им прещения,/ ведуще, яко и вам самим и тем Господь есть на Небесех,/ и обинования лица несть у Него.

На литии стихиры, глас 8:

О, благоутробия Божия неизреченнаго,/ о, человеколюбия неизглаголаннаго:/ яви бо нам Господь святителя чудна, Филарета велемудреннаго,/ молитвенника и печальника,/ судию и провидца,/ книжника и ветию,/ чудотворца и праведника,/ да спасутся вси,/ иже спасения чают.

Якоже патриархом древним иногда,/ век долгий дарова ти Господь, святителю Филарете,/ еже о гресех народа плакати,/ о царех молитися,/ о славе отечества Бога хвалити,/ кормилом церковным мудро правити,/ падших воздвизати к покаянию,/ суд праведный творити,/ да спасутся вси,/ иже спасения чают.

Иже платоновым многомудрием не прельстивыйся,/ инаго Платона, архиерея славна,/ ученик явился еси, богомудре Филарете,/ не суемудрием мирским прославився,/ но смиренномудренно Христу и людем послужил еси,/ да спасутся вси,/ иже спасения чают.

Слава, глас тойже:

Яко преемник апостольский,/ во благовестии Христове добре потрудился еси, святителю,/ еже изложити слово Божие/ и писания святых отец российскойю речию,/ удобь разумеваемою людьми земли нашея,/ и правила веры и благочестия начертал еси,/ верным утверждение подаваяй / и заблудшим путь к покаянию указуяй,/ да спасутся вси,/ иже спасения чают.

И ныне, Богородичен: Владычице, приими молитвы раб Твоих:

На стиховне стихиры, глас 2.

Подобен: ДOME Евфрафов:

Сосуде избранный,/ слезами омытый,/ благодати и милости,/ яко мира исполненный,/ Филарете, святителю премудрый.

Стих: Восхвалятся праведнии во славе/ и возрадуются на ложах своих.

Око умное Церкви,/ светом истины/ преславно возсиявшее,/ столпе богомыслия,/ Филарете, избранниче Христов.

Стих: Священницы Твои облекутся в правду/ и преподобнии Твои возрадуются.

Царя Небеснаго архитектон изрядный,/ царей земных поборниче,/ труба золотая богословия,/ уста благочестия,/ Филарете святителю прехвальный.

Слава, глас 8:

Днесь Коломна именитая,/ возрастившая тя,/ благочестием твоим хвалится,/ днесь обитель Троицы Живоначальной,/ обретши мощи твоя, яко сокровище пребогатое, ликует,/ днесь Москва

первопрестольная святительство твое величает,/ днесь Русь святая
празднует светло,/ честную память твою, Филарете, святителю
достохвальный.

И ныне, Богородичен: Безвестная Дево:

Тропарь, глас 4:

Духа Святаго благодать стяжав,/ Богомудре святителю Филарете,/ и истину и правду разумом просвещенным/ людям проповедал еси,/ мир и милость сердцем умиленным/ страждущим явил еси,/ яко учитель веры и страж неусыпный/ паству российскую жезлом правости сохранил еси./ Сего ради дерзновение ко Христу Богу имея,/ моли даровати Церкви утверждение/ и душам нашим спасение.

На утрени

На Бог Господь: тропарь святителя, дважды. Слава, и ныне, Богородичен.

По 1-м стихословии седален, глас 8:

Ныне радуется душа твоя, святителю Филарете, Господу предстоящи,/ облече бо ты в ризу спасения,/ и яко жениху возложи ти венец,/ и яко невесту украси ты добродетелей красотою,/ темже моли спастися всем нам.

Слава, и ныне, Богородичен:

О Тебе радуется, Благодатная, всякая тварь,/ Ангельский собор и человеческий род,/ освященный храм и раю словесный,/ девственная похвало,/ из Неяже Бог воплотися и Младенец бысть прежде век сый Бог наш:/ ложесна бо Твоя Престол сотвори и чрево Твое пространнее Небес содела./ О Тебе радуется, Благодатная, всякая тварь, слава Тебе.

По 2-м стихословии, глас 3:

Измлада велию любовь стяжал еси к Богу,/ и сила Божия в немощи плоти твоя совершися, святителю Филарете,/ егда ниву земли Русския ралом Божественных словес возделал еси,/ ныне же, яко время жатвы прииде,/ испроси нам у Бога велию милость

Слава, и ныне, Богородичен:

Божественная скиния была еси Слова,/ едина Пречистая Мати Дево,/ чистотою Ангелы превозшедшая,/ мене, паче всех персть бывша и осквернена плотскими прегрешеньми,/ очисти молитв Твоих водами,/ подаючи, Чистая, велию милость.

По полиелеи седален, глас 4:

От юности руку возложь на рало Христово,/ поты и слезами многими сердце добре угобзил еси,/ клас духовный серпом смирения пожал еси/ и, плод сторичный собрав,/ пищею духовною тысящи насытил еси./ Сподоби и нас ея причастниками быти, празднующих любовию святую память твою.

Слава, и ныне, Богородичен:

О, Всепетая Мати!/ Усты святых прославленная,/ псалмы духовными воспетая,/ имены таинственными нареченная,/ прими от нас, грешных, архангелов глас, вопиющих Ти:/ радуйся, Благодатная, Господь с Тобою.

Степенна 1-й антифон 4-го гласа. Прокимен, глас 4: Благовестих правду в церкви велицей. Стих: Уста праведнаго каплют премудрость и язык его возглаголет суд. Евангелие от Иоанна, зачало 35 от полу.

По 50-м псалме стихира, глас 6:

Пастырю мудрый Филарете,/ звездо светозарная,/ в Церкви Российской возсиявшая,/ якоже иная волхвом иногда,/ приведи и нас поклониться рождшемуся Христу Спасу/ и миро покаяния,/ ливан милосердия,/ и смирну дел благих принести Ему.

Канон, глас 6

Песнь 1

Ирмос: Помощник и Покровитель/ бысть мне во спасение/ Сей мой Бог/ и прославлю Его,/ Бог отца моего / и вознесу Его,/ славно бо прославися.

Всемиловитиве Господи,/ даждь ми мысль благу и настави сердце мое,/ во еже прославити дивнаго во святителех Филарета прехвального.

Яко плодоносная ветвь, от благочестиваго корене и священническаго древа произшед, святе Филарете,/ благодать архиерейства достойно восприял еси./ Сего ради благодарне псаломски вопием:/ род правых благословится.

Юн разум к Божественным учением направив, премудре Филарете,/ даже до честных седин в законе Господни поучался еси день и ночь,/ сего ради плод сториичный Богу принесл еси.

Богородичен: Богородице Дево,/ якоже во успении Твоем мира не оставила еси,/ буди и нам Путеводительница во Царствие Сына Твоего и Бога нашего.

Песнь 3

Ирмос: Утверди, Господи,/ на камени заповедей Твоих/ подвигшееся сердце мое,/ яко един свят еси и Господь.

Филарета Милостиваго имя приемь, святителю Филарете,/ сосуд добродетелей твоих милостию украсил еси,/ сего ради, яко отец чадолюбивый, людем российским явился еси.

Во всем последуй Божественным отцем,/ премудрость Божию, яко наставницу, избрал еси, святителю,/ и Церкви Российской добрый пастырь быв,/ благочестию паству научил еси.

Златоусту славному силою слова подобяся,/ Бога Слова воистинну возславил еси, святителю Филарете,/ темже словесными венцы тя величаем.

Богородичен: Несть пречиста, яко Ты, Дево,/ и несть грешен, яко аз, окаянный,/ темже, безнадежен сый, на Тя упование мое возлагаю.

Седален, глас 8:

Ты еси пастырь добрый и учитель богомудрый,/ святителю отче Филарете,/ тобою Бог украси Церковь Свою / и тело твое многолетно покровенное в земли нетленно яви людем Своим./ Темже не престай молиться о хвалящих тя / и чтущих память твою, / прося оставления грехов и спасения душам нашим.

Слава, и ныне, Богородичен:

Яко Всенепорочная Невеста Творца,/ яко Неискусобрачная Мати Избавителя,/ приятелище яко сущи Утешителя, Препетая,/ светлое жилище добродетелей соверши мя,/ отжени облак страстей и Вышняго причастия сподоби/ и света невечерняго молитвами Твоими.

Песнь 4

Ирмос: Услыша пророк/ пришествие Твое, Господи, и убоясь,/ яко хочещи от Девы родитися/ и человеком явится и глаголаше:/ услышах слух Твой и убояхся,/ слава силе Твоей, Господи.

Христа Бога Помощника и Заступника присно имея в сердце твоём, святителю Филарете,/ яко древле Моисей началовождь, в бедах и искушениях люди укреплял еси/ и научал еси звать к Нему, яко Помощнику и Заступнику.

Сугубое попечение о юных людех имел еси, святителю Филарете,/ еже быти им благочестивым, трудолюбивым и рачительно учащимся закону Господню / и служити Церкви на похвалу и отечеству на пользу.

Любовь небесную на земли евангельски стяжавый,/ горе управил еси душу твою, преславне Филарете,/ наставляя верныя люди горняя помышляти, а не себе угождати.

Богородичен: Совета Превечнаго смотрение разумев пророк,/ тайну рождества Девы преднаписуяй, зываше:/ возвеселюся о Бозе, Спасе Моем.

Песнь 5

Ирмос: Союзом любви связуеми апостоли,/ владычествующему всеми себе Христу возложше,/ красны ноги очищаху,/ благовествующе всем мир.

Апостольское речение, яко сила Божия в немощи совершается,/ на тебе исполнися, святителю./ Ты бо, немощен плотию, пажить Земли Русския Божественными словесы возделал еси/ и многия люди ко Христу привел еси.

Благодати Святаго Духа исполнися,/ слово Божие ревностно проповедал еси / и тайну Пресвятыя Троицы и воплощения Бога Слова преизящно изъяснил еси./ Ныне же Богу предстоя,/ молися о почитающих тя, Филарете достопамятне.

Яко зеницу ока и сокровище многоценное,/ хранить веру Православную заповедал еси нам, святителю Филарете,/ в ней бо есть утверждение Церкви и отечества благоденствие.

Богородичен: Отчую Премудрость во утробе Твоей носившая, Владычице,/ в нощи мира блуждающих к свету Христову настави и союзом любви соедини,/ яко Богородица еси и Матерь Света.

Песнь 6

Ирмос: Возопих всем сердцем моим к Щедрому Богу / и услыша мя от ада преисподняго,/ и возведе / от тли живот мой.

Премудростию Божиею вразумляемь, / яко Соломон мудрый, суд правый и милостивый потщался еси творити, / да ведают людие, яко прави суть пути Господни.

Ведая горькия работы и тяготы жития земледелателей, святителю Филарете,/ потщался еси помощи российскому государю провозгласити людем чаемое освобождение.

О, любы Бога Отца, распинающая,/ любы Сына, распинаемая/ и любы Духа Святаго, торжествующая силою крестною,/ - благоговейне взывал еси, святителю Филарете.

Богородичен: О, Дево Пречистая, / Словом Божиим «да будет» отразила еси от Себе законное по естеству недоумение, / егда Гавриил архангел Ти предста, благовествуя рождество Еммануила, / - благоговейне взывал еси, святителю Филарете.

Кондак, глас 2:

Яко истинный подражатель преподобнаго Сергия,/ добродетель измлада возлюбил еси, богоблаженне Филарете./ Яко пастырь праведный и исповедник непорочный/ по святем преставлении от безбожных поругание и поношения приял еси,/ Бог же знаменми и чудесы тя прослави/ и заступника Церкви нашае яви.

Песнь 7

Ирмос: Отроцы в Вавилоне пещнаго пламене не убояшася,/ но посреде пламене ввержени,/ орошаеми пояху:/ благословен еси, Господи Боже отец наших.

Якоже Елисей иногда милоть Илиину,/ клобук от гроба святителя Алексия приял еси, святителю Филарете,/ да благодать сугубую получиши, воспевая:/ благословен еси, Боже отец наших.

Аще и чтил еси царя земнаго, / но раболепствовати пред Ним не восхотел еси, святителю,/ Царю же Небесному боголепную честь воздавал еси, взывая:/ благословен еси, Боже отец наших.

Работая Господеви со страхом,/ не взирал еси на похваления и поношения, святителю Филарете,/ токмо в сердце с трепетом взывал еси к Судии Праведнейшему:/ благословен еси, Боже отец наших.

Ум чист, чувства добрая и волю благую,/ яко едино во образ Троицы Святыя имея, святителю Филарете,/ Троицы единосущие прославил еси, взывая:/ благословен еси, Боже отец наших.

Богородичен: Отроковице Пречистая,/ чудесе рождества Твоего дивящися,/ Избравшему Тя зовем:/ благословен еси, Боже отец наших.

Песнь 8

Ирмос: За законы отеческия / блаженнии в Вавилоне юноши предбедствующе,/ царюющаго оплеваша повеление безумное / и совокуплени, имже не сварившася огнем,/ державствующему достойную воспеваху песнь:/ Господа пойте дела и превозносите во вся веки.

Егда благий Господь попусти поветрие губительное во граде Москве, / тогда ты, святителю Филарете, к покаянию и молебствию народ призывал еси взывати: / Господа пойте дела и превозносите во вся веки.

Иже молитвами твоими исцеление обретшии, / и спасение от смерти улучившии, / благодарственное пение принесоша,

глаголюще: / Господа пойте дела и превозносите во вся веки.
Отцем святым подражая, / уставы иночеству преподал еси, святе, /
да ангелом сослужат иноков собори и с ними лики невест
Христовых, взывающе: / Господа пойте дела и превозносите во вся
веки.

Богородичен: Царицу Небесе и земли ангелов сонмы и человеков
собори, / пойте и превозносите во вся веки.

Песнь 9

Ирмос: Странствия Владычня, / и Безсмертныя Трапезы / на
Горнем месте / высокими умы, вернии, приидите, насладимся, /
возшедша Слова от Слова научившися, / Егоже величаем.
Ревностию по Бозе на высоту добродетелей возшед, / славы мира
сего удалялся еси, святе, / взыскуяй славы токмо от Христа, / Той
бо есть единый Царь мира и Спас душ наших.

Егда свершися кончина святая твоя, / возскорбеша людие
российстии, достохвальне святителю, / ты же не оставил еси их
сиры, / дерзновенно моляся единому Царю мира и Спасу душ
наших.

Торжествуйте, людие, / святителя Филарета память чтуще, / иже
служитель дома Богородицы быв, / прослави Ту, яко в молитвах
неусыпающую Заступницу.

Богородичен: Русь Святая, ликуй ныне, / за тя бо молит Сына
Своего / Пречистая Богородица Дева с Филаретом
приснохвальным / и всеми святыми твоими.

Светилен:

Яко благочестия лампаду светолучну, / ритора преизящна,
пастыря милосердна, судию премудра, / приидите, вернии,
Филарета благоподателя любовию ублажим.

Слава, и ныне, Богородичен:

Что Ти принесем, Благодатная, / руки имуще осквернены; / како
воспоем Тя, / уста имуще нечиста; / како восхвалим Тя, / сердце
имуще лукаво; / обаче молитвами святителя Филарета взываем
Ти: / радуйся, Невесто Невестная.

На хвалитех стихиры, глас 5.

Подобен: Радуйся, Живоносный Кресте:

Радуйся, святителю отче Филарете! / Таинство Креста познавый, /
и стезею неботечною / чрез скорби и славу мира шествовавый, /
пред цари и нищими / слово крестное глагола еси / и сие неложно
житием запечатлел еси, / приемь от Господа венец и велию
милость.

Радуйся, святителю отче Филарете! / Ты Христу волею последовал
еси, / не токмо на Фаворе во славе с Ним быти желавый, / но и на
Голгофу верно восшедый, / по смерти же поруганию телесе предан
был еси / и, яко зеркало светлое солнца истины, / стране
Российстей явился еси. / Сего ради обрел еси у Господа венец и
велию милость.

Радуйся, святителю отче Филарете! / Ты иго Христово благое добре
понесл еси, / ризу души своя исткав, / светлейшу паче риз

земных./ Благодать же Божия,/ юже подвигом тайным стяжав,/ яви тя тепла молитвенника/ и даром пророчества, знаменми и чудесы прослави тя./ Сего ради тя ублажаем.

Слава, глас 2:

О, Филарете славный,/ слову истины делом последуя,/ подвигом сокровенным подвизался еси,/ темже яко и апостолом иногда,/ дадеся ти власть от Христа Бога/ бесы изгоняти и немощныя целити,/ грядущая прорицати и от бед избавляти,/ сего ради убо прославльшаго тя Господа славы/ умиленною душею/ православно величаем.

И ныне, Богородичен, глас тойже:

Все упование мое на Тя возлагаю,/ Мати Божия,/ сохрани мя под кровом Твоим.

На Литургии

Блаженны от канона, песнь 3-я и 6-я. Прокимен, глас 1: Уста моя возглаголют премудрость,/ и поучение сердца моего разум. Стих: Услышите сия, вси языцы, внушите, вси живущии по вселенней. Апостол ко Ефесеем, зачало 233. Аллилуия, глас 4: Уста праведнаго поучатся премудрости. Стих: Язык его возглаголет суд. Евангелие от Матфея, зачало 11. Причастен: В память вечную будет праведник:

Евангелие от Матфея (зачало 11, глава 5, 14-19):

Рече Господь Своим учеником:/ Вы есте свет мира;/ не может град укрытися верху горы стоя./ Ниже вжигают светильника/ и поставляют его под спудом, но на свещнице,/ и светит всем, иже в храmine суть./ Тако да просветится свет ваш пред человеки,/ яко да видят ваша добрая дела/ и прославят Отца вашего, иже на Небесех./ Да не мните, яко приидох разорити закон или пророки,/ не приидох разорити, но исполнити./ Аминь бо глаголю вам:/ дондеже преидет небо и земля,/ йота едина, или едина черта не преидет от закона, дондеже вся будут./ Иже аще разорит едину заповедей сих малых,/ и научит тако человеки,/ мний наречется в Царствии Небеснем,/ а иже сотворит и научит,/ сей велиий наречется в Царствии Небеснем.